

# Sustegn per las finamiras da la regenza

■ **(anr/fa) ler s'ha occupà il cussegl grond cun il program annual 2015. El ha prendi enco-nuschientscha da las finamiras da la regenza.** Ina da las finamiras da la regenza per l'onn 2015 è la refurma territoriala cun las 11 regiuns. Quella entra en vigur pir l'onn 2016. Il retard dad in onn hai dà, sco che cussegliera governativa *Barbara Janom Steiner* ha declarà, causa il referendum cunter questa refurma. In'otra finamira prevesa da simplifitgar sin nivel federal las cundiziuns generalas per la forza idraulica per ch'ìs projects cun forza idraulica

possian vegnir realisads da maniera optimada. A la dumonda da *Beat Deplazes* (ps, Cuir) co che quella finamira duess vegnir cuntanschida ha respundi Janom Steiner ch'ins veglia simplifitgar las proceduras da permissiun, «surtut cun evitar duplicitads».

## **Render pli raziunala la lavur tar l'agricultura**

Tar la finamira dad augmentar la creaziun da valur tar l'agricultura ha menziunà Beat Deplazes ch'ìl dumber da purs sa diminueschia pli e pli en Grischun. El ha vulì savair pertge ch'ì regnia tuttina in

grond basegn per novas infra-structuras, p. ex. novas stallas e novs projects da meglieraziun. Cusseglier guvernativ *Hansjörg Trachsel* ha respundi che las meglieraziuns hajan la finamira da stgaffir a lunga durada structuras optimalas per far da pur da moda raziunala e cun damain gliued che gida sin ils bains purils. «Il medem vala per las novas stallas, quellas gidan ils purs da far lur lavur pli raziunalmain e cun damain gidonters.» Il parlament ha sustegnì cun 109:0 vuschs las finamiras e las mesiras che la regenza ha formulà en il program annual 2015.